

ჩემპიონი იცავს პრესტიჟს

კიევი. "დინამოს" სტადიონი. 11 აპრილი.

"დინამო" (კიევი) – "დინამო" (თბილისი) 1:1 (0:0).

კიევი: რომენსკი, კონკოვი, ბალტაჩა, ჟურავლიოვი, ზუევი, ლოზინსკი, კაპლუნი (ბურიაკი), ხაჰსალისი, ბესონოვი, ვერემეევი (სლობოდანი), ბლოხინი.

თბილისი: გაბელია, კოსტავა, ჩივაძე, ხინჩაგაშვილი, მუჭირი, დარასელია, მ. მაჩაიძე, ქორიძე, გუცაევი, გ. მაჩაიძე (მინაშვილი), შენგელია (ჩელებაძე).

მსაჯი: ვ. შკლოვსკი (მოსკოვი).

გოლები: ბლოხინი (63-ე წ.), გუცაევი (87, პენალტით).

დუბლიორები - 2:2 (ბოიკო, ბობალი, ბოლქვაძე (2)).

მატჩის 63-ე წუთი. კიეველთა შეტევა მარცხენა ფლანგიდან. ხაჰსალისი. დაბალი, გასწვრივი ჩანოდება. ერთხანს თბილისელთა საჯარიმოში ტრიალებს ბურთი, მერე ნელა, ძალიან ნელა გაგორდა კარისკენ... წამით შეჩერდნენ ფეხბურთელები, მონუსხულივით შესცქერიან ბურთს. გოლია? ერთ გრძელ წამს გაგრძელდა ეს ლოდინი. პირველი ბლოხინი მოეგო გონს, სველ ბალახზე გასრიალდა, მისწვდა კიდევ თეთრ ხაზზე შეყოყმანებულ ბურთს და კარში შეაგორა.

უკვე შემდეგ აეროპორტისკენ მიმავალ გზაზე, ექსპრესში ვისმენდი მატჩის ჩანაწერს: "შეხვედრის დამთავრებამდე 16 წუთი რჩება. ანგარიშია 1:0 კიევის "დინამოს" სასარგებლოდ. კიეველები ბევრს უტევენ, მაგრამ მხოლოდ ერთი გოლის გატანა შეძლეს. 63-ე წუთზე ხაჰსალისის ჩანოდების შემდეგ ბურთი თბილისელთა კარში გაიტანა ოლეგ ბლოხინმა".

წლევანდელ საფეხბურთო სეზონში ეს თბილისელთა მე-16 მატჩი იყო. 15-მატჩიანი სერია გუნდმა დაუმარცხებლად განვლო. მერე შარშანდელი და შარშანწინდელი კიევეური მატჩებიც მახსენდება - 0:1 და 0:2. არადა ერთშიც და მეორეშიც ქულა მაინც ნამდვილად ეკუთვნოდა თბილისელებს, ერთშიც და მეორეშიც კიეველები მდევრის როლში იყვნენ...

სახელდახელოდ მოწყობილ ტაბლოზე კიეველთა მხარეს უკვე დაიწერა ერთიანი, გახარებულ მაყურებელს უკვე დაგინწყბია უხეირო სტარტით გამოწვეული წყენა და "შაიბუ, შაიბუთი" კიდევ ერთ გოლს ითხოვს. თბილისელები ნირნამხდარნი უახლოვდებიან ცენტრში დადებულ ბურთს.

მატჩის წინა დღე. ბორისპოლის აეროპორტი. თვითმფრინავიდან გადმოსვლისთანავე უსიამო ფიქრი ამყვა. გაბონებზე თოვლი დევს, ნამდვილი ზამთარია კიევი. დილით სიცივეს ნისლიც დაემატა. "დინამოს" სტადიონზე (ცენტრალური სტადიონი მხოლოდ მერმის ჩადგება მწყობრში) ასფალტის სატკეპნი მანქანები გრუხუნებდნენ. მატჩი 5 საათზე იწყება, სკამები ჯერ კიდევ დაუნომრავია, აქა-იქ დაუმთავრებელიც. მინდვრის გარშემო ახვეტილი თოვლის გორები ღვას.

წლევანდელი საფეხბურთო სეზონი კიევი ამ მატჩით იწყება. ფეხბურთის მარში. მისასალმებელი სიტყვები. ვერაფერი სასიამოვნოა სიცივეში ერთ ადგილზე დგომა და ლოდინი, მაგრამ რას იზამ. როგორც იქნა კაპიტნებმა ალაპიკ აღმართეს.

კოლექტივისთვის, სეზონის მთავარი ჯილდოების დაუფლების პრეტენზიას რომ აცხადებს, ყოველი მატჩი, ყოველი ქულა მნიშვნელოვანია, მაგრამ არის მატჩები, რომლებიც მრავალშრიანი ფსიქოლოგიური წანამძღვრების გამო გადამწყვეტ

მნიშვნელობას იძენს. ამგვარ შეხვედრებში გამარჯვებას ან მარცხს (ქულები ამ შემთხვევაში მეორეხარისხოვან როლს თამაშობს) გუნდისთვის ან ის აუცილებელი რწმენა მოაქვს, წარმატების საფუძვლად რომ იქცევა ხოლმე, ანდა ისეთ ბზარს აჩენს, მერე და მერე ფსიქოლოგიური დეპრესია და შედეგად უფერული თამაში რომ მოსდევს. ასეთთა რიცხვს შეგვიძლია მივაკუთვნოთ შარშან კიევის "დინამოსთან" თბილისში, მოსკოვის "დინამოსთან" და ცხკა-სთან მოსკოვში ნათამაშები მატჩები. უთუოდ ამ რიგისა იყო ჩემპიონისა და ვიცეჩემპიონის ამასწინანდელი შეხვედრაც. სიუჟეტს მეტი სიმძაფრე შესძინა იმანაც, რომ მატჩი უკრაინელი ფეხბურთელებისთვისაც განსაკუთრებული უნდა გამომდგარიყო - დარწმუნებით შეიძლება ითქვას, რომ ჩემპიონთან გამარჯვება გვარიანად ათბობდა კიეველთა მინავლებულ ბუხარს.

პირველი ოცი წუთი გართულებულ სათამაშო პირობებთან შეგუებასა და ფსიქოლოგიური უპირატესობის მოპოვების ცდას დასჭირდა. სველ მინდორს პირველმა კიეველებმა აუღეს ალღო, მათი ერთგვარი ტერიტორიული უპირატესობა კი (უფრო მოჩვენებითი რომ იყო) სრულებით არ ნიშნავდა თამაშის სადავეების დაუფლებას. მართალია, კარგა ხანს უმოქმედოდ იმყოფება თბილისელთა თავდასხმა, მაგრამ დანარჩენები მშვიდად, ყოველგვარი პანიკის გარეშე იგერიებენ მასპინძელთა არც თუ მახვილგონივრულ იერიშებს. ერთი დეტალი: ფლანგურმა ჩანოდეებმა, არეგ-დარევა რომ შეაქვს ხოლმე მეტოქის რიგებში, ამ დღეს ბევრი ვერაფერი სამსახური გაუნია კიეველებს, თუმცა ამაში "ბრალი" უფრო სტუმრებს მიუძღვით - ორივე ცენტრალურ ნახევარმცველს - მანუჩარ მაჩაიძესა და ქორიძეს, განსაკუთრებით კი სტოპერებს - ჩივაძესა და ხინჩაგაშვილს. იგივე ბედი ეწია კიეველთა სახელგანთქმულ კუთხურებსაც. ერთი სიტყვით, საჰაერო ბრძოლა თბილისელთა საჯარიმოში სტუმართა სასარგებლოდ დამთავრდა.

შენგელიას მორიგეობით დარაჯობენ ბალტაჩა და ჟურავლიოვი. გუცაფევი ერთთავად მარჯვენა ფლანგიდან ცდილობს იერიშის წამოწყებას. თბილისელთა თავდასხმის მარცხენა ფრთა კი მოშიშვლებულია. გოჩა მაჩაიძე (ამ დღეს მარცხენა ნახევარმცველად თამაშობდა), მცველის როლშიც რომ ახერხებს ხოლმე შეტევის წარმონწყებას, დაცვით ფუნქციებს სჯერდება. შესვენების შემდეგ კიეველებმა მარჯვენა მცველი ვაპლუნი ბურიაკით შეცვალეს - როგორც ჩანს, ფლანგზე მცველის ყოფნა მეტისმეტ ფუფუნებად მიიჩნის.

სავსებით ლოგიკურია, რომ ამა თუ იმ გუნდის უპირატესობაზე საგოლე მომენტების რაოდენობით მსჯელობენ. ამ თვალსაზრისით პირველ ტაიმში რომელიმე მეტოქის უპირატესობაზე საუბარი მართებული არ იქნებოდა. სახიფათო მომენტი, რომელიც შუა ტაიმში თბილისელთა კართან შეიქმნა, ერთადერთი იყო. ბლოხინის დარტყმა უზუსტო გამოდგა.

მატჩის წინ დაწყებული თოვა არც მეორე ტაიმში შეწყვეტილა. მინდორი ატალახდა. თბილისელები შედარებით უკეთ თამაშობენ, მაგრამ ზუსტი გადაცემები მაინც ჭირს.

იმავე საღამოს, თვითმფრინავში მ. მაჩაიძე: სველი მინდორი კიდევ არაფერი, შეეჩვევი ვაცი, მაგრამ თოვლი... გაყინული ფეხები აღარ გემორჩილება, ბუნებრივია აღარც ბურთი გიჭერებს".

შენგელია კვლავინდებურად მცველთა მარწუხებშია, სამაგიეროდ საგრძნობლად გააქტიურდა გუცაევი. კიეველები აკრძალული ილეთებით ცდილობენ თბილისელი ფორვარდის უენებელყოფას. მიუხედავად მინდვრის შუაგულის გაძლიერებისა (ბურიაკი), ცენტრში წონასწორობა არ დარღვეულა - ქორიძე და მანუჩარ მაჩაიძე იოლად უმკლავდებიან მოძალებულ მეტოქეს. ყველაფრით იგრძნობა, რომ მასპინძლები შესაძლებლობის ზღვარზე თამაშობენ, დამატებითი რესურსები არც ჩანს და ალბათ არც გამოჩნდება. თავისთავად ისახება სავსებით დამსახურებული ქულის კონტურები. ყველა ზემონათქვამის გათვალისწინებით ფრე ურიგო შედეგი არ უნდა იყოს.

63-ე წუთი. მასპინძელთაგან ყველაზე აქტიური ხაჰსალისი დაუბრკოლებლად შედის უმეთვალყუროდ დატოვებულ თბილისელთა დაცვის მარჯვენა ფლანგზე და ძლიერად აწოდებს კარის გასწვრივ...

უხეიროა თუ ლამაზი, გოლი მაინც გოლია და შემთხვევითობაზე საუბარი სწორი არ იქნებოდა. თუნდაც იმიტომ, რომ სახითათო ჩანოდება თბილისელთა შეცდომამ განაპირობა.

ისევ გამახსენდა კიევეში წაგებული ორი მატჩი და უნებურად ვიფიქრე, რომ საბოლოო სიტყვა ისევ უსიამო ტრადიციას რჩებოდა.

შეტევა თავდაცვის საუკეთესო საშუალებაა. ეს საფეხბურთო აფორიზმი ნებისმიერი გუნდისთვის კარგად არის ცნობილი. მშვენივრად იცოდნენ მასპინძლებმაც, რომ მიღწეულ წარმატებას მეორე გოლით თუ არა, შეტევით მაინც ესაჭიროებოდა განმტკიცება. თუმცა, როგორც ჩანს, საამისო საშუალებები ველარ გამოძებნეს. შეტევაზე ჩემპიონი გადავიდა. იმის თქმა, რომ თბილისელთა იერიშის ლოგიკური დასასრული აუცილებლად გოლი უნდა გამომდგარიყო, არ შეიძლება, მაგრამ იერიში თავისთავად გულისხმობს საამისო მცდელობასაც და შესაძლებლობასაც.

87-ე წუთი. თბილისელთა კომბინაცია. მანუჩარ მაჩაიძე-ჩივაძე - ისევ მანუჩარი... კაპიტანმა ბურთი დარასელიას მიანოდა, თვითონ მარჯვნივ გაიტყუა მცველი. დარასელიამ უმაღლეს მცველებსგან გათავისუფლებული ჩელებაძე... გადაცემა... რევაზს ჯერ ერთი მცველი აჩერებს ხელით, მერე მეორეც წამოწია და... თუმცა თბილისელმა თავდამსხმელმა ნაქცევისას მაინც მოახერხა, დარტყმას ის ძალა აღარ ჰქონდა. შეხვედრის არბიტრმა შკლოვსკიმ უყოყმანოდ ანიშნა თერთმეტმეტრიან საჯარიმოზე...

მატჩის შემდეგ გასინჯულმა ვიდეოჩანანერმა მასპინძელთა უკმაყოფილება მაინც ვერ დააცხრო. თვით წესის დარღვევის ფაქტს კამათი არ გამოუწვევია. შკლოვსკის ედავებოდნენ იმაზე, რომ მაშინვე, მცველთა მიერ აკრძალული ილეთის ხმარებისას არ მიმართა სასტვენს. მსაჯის პასუხი ლაკონიური იყო: სასტვენი დამნაშავეთა სასარგებლოდ იქნებოდა”.

პენალტის დარტყმა ყოველთვის ძნელია. განსაკუთრებით ასეთ მატჩში და ისიც შეხვედრის დამთავრებამდე სამი წუთით ადრე. გუცაემა მშვიდად და ზუსტად შეასრულა საპასუხისმგებლო მისია - 1:1.

ამ საინტერესო მატჩმა გამარჯვებული ვერ გამოავლინა, მაგრამ უხერხული არ იქნება იმის თქმა, რომ მორალური გამარჯვება, მომავალში სასიკეთოდ რომ ადგება ნებისმიერ გუნდს, თბილისელებს დარჩათ.

ი. ბერიაშვილი (ჩვენი სპეც. კორ.).
”ლელო”, 14 აპრილი, 1979 წ.